

4
6

宋王閼之撰
澠水燕談錄
全

進步書
局校印

宋

王闢之著

澠水燕談錄

上海進步書局印行

澠水燕談錄提要

宋當真仁英神時代為人才極盛
之時賢哲接踵而起一言一行皆
足矜式闢之作是書蓋不徒搜拾
舊聞藉博談助也卷凡十為類十
七通篇无一恠誕無益之語尤為
矜嚴名貴

澠水燕談錄序

澠水譚者齊國王闢之將歸澠水之上治先人舊廬與田夫樵叟閒燕而譚說也余登科從仕行三十年矣日欲退居故國而為貧未果今且老矣仕不出乎州縣身不脫乎飢寒不得與聞朝廷之論史官所書閒接賢士大夫譚議有可取者輒記之久而得三百六十餘事私編之為十卷蓄之中橐以為南畝北窓倚杖鼓腹之資且用消阻志遺餘年耳澠齊水之名其事隨所錄得之故無先後之序紹聖二年正月甲子序

題語

前人記賓朋燕語以補史氏者多矣豈特屑屑記錄以為譚助而已哉齊國王闕之聖塗余同年進士也從仕已來每於燕閒得一嘉話輒錄凡數百事大抵進忠義尊行節不取怪誕無益之語至於賦詠談謔雖若瑣碎而皆有所發讀其書亦足知所存矣元祐四年予來守蒲聖塗方為邑河東因得其錄而觀之十二月朔昌邑滿中行思復碧莎廳題

澠水燕談錄目錄

官制 二十七事

卷第一

卷第六

帝德 十八事

貢舉 十四事

讜論 十一事

文儒書籍附共 十四事

卷第二

先兆 二十事

名臣 五十事

卷第七

卷第三

歌詠 二十四事

知人 四事

書畫 十一事

奇節 十三事

卷第八

卷第四

事誌 三十六事

忠孝 十五事

卷第九

才識 十三事

雜錄 三十六事

高逸 二十二事

卷第十

卷第五

談諧 二十三事

稗海所刻澠水燕談錄十卷缺第十卷談謔一則以第四卷分作兩卷符十卷之數又缺序目非足本也是冊乃虞山趙清常家藏本前有王聖塗自序同年進士滿中行題語其第十卷從宋雕錄出餘各卷較稗海又多三十一條粲然完備亦可喜也癸丑季春雨窗李北苑題於京邸之鷗舫

澠水燕談錄卷第一

帝德凡十八事

宋 齊國王闡之聖塗著

西都北寺應天禪院。乃太祖誕聖之地。國初為傳舍。真宗幸洛陽。顧瞻遺迹。徘徊感愴。乃命建為僧舍。功成。賜院額。奉安神御。命知制誥劉筠誌之。仁宗初。又建別殿。分二位塑太宗真宗聖像。丞相王欽若為之記。後園植牡丹萬本。皆洛中尤品。慶曆末。仁宗御篆神御三殿碑。藝祖曰興先。太宗曰帝華。真宗曰昭孝。今為忌日行香地。去留府甚遠。故詩曰。正夢寐中行十里。此之謂也。

開寶中。教坊使魏某年老。當補外。援後唐故事。求領小郡。太祖曰。伶人為刺史。豈治朝事。尚可法耶。第令於本部中遷叙。乃以為太常太樂令。

興國中。張觀樂史鑠廳合格。不得進士第。止以為幕職官。太宗之愛惜科名如此。

慶曆中。郎官呂覺者。勘公事已回。登對。自陳衣緋已久。乞改章服。仁宗曰。待別差遣。與卿換金紫。朕不欲因鞫獄與人恩澤。慮刻薄之徒。望風希進。加人深罪耳。帝寬厚欽恤之德如此。廟號曰仁。不亦宜乎。

明道二年二月十一日。仁宗行籍田禮。上就耕位。侍中奉耒進御。上耜耒東來三推。禮儀使奏禮成。上曰。朕既躬耕。不必泥古。願終畝以勸天下。禮儀使復奏。上遂耕十有二畦。翌日作籍田禮畢詩。賜宰臣以下和進。尋詔呂文靖公編為籍田記。時許開封國學舉人陪位。因得免解。

寶元康定間。西方用兵。急於邊用。言利者多。據撫細微。頗傷大體。仁宗厭之。乃詔曰。議者並須究知本末。審可施行。若事已上而驗白無狀者。事效不著。當施重罰。於是輕肆者知畏。而不敢妄言利害也。

仁宗朝。南劍州上言。石碑等銀鑛可發。上謂三司使曰。但不害民。則為利國。或於民有害。豈可行也。上之恤愛元元至矣。

晁文元公迥。在翰林以文章德行為仁宗所優異。帝以君子長者稱之。天禧初。因草詔得對。命坐賜茶。既退。已昏夕。真宗顧左右取燭與學士。中使就御前取燭執以前。導之出內門。傳付從吏。後曲燕宜春殿。出牡丹百餘盤。千葉者纔十餘朵。所賜止親王宰臣。真宗顧文元及錢文僖各賜一朶。又常侍宴。賜禁中名花。故事。惟親王宰臣。即中使為插花。餘皆自戴。上忽顧公。令內侍為戴花。觀者榮之。其孫端稟嘗為余言。

咸平三年大理寺上言曰。本寺案牘未決者常幾百事。近日逾月並無公案。漢文決死刑四百。唐太宗決死罪三百。史臣書之以為刑措。今以四海之廣。而奏牘不聞。動輒逾月。足以知民識禮義而不犯於有司也。請載之史筆。

祥符中。諸王有以翰林使醫有效。乞除遥郡。真宗曰。醫之為郡。非治朝美事。厚賜之可也。仍令宰相諭此意。

真宗一日晚坐承明殿。召學士對。既退。中人就院宣諭曰。朕適忘御袍帶。卿無訝焉。學士將降謝。中人止之云。上深自媿責。有旨放謝。真宗禮遇詞臣厚矣。

太祖討平諸國。收其府藏貯之別府。曰封樁庫。每歲用之餘皆入焉。嘗語近臣曰。石晉割幽燕諸郡以歸契丹。朕憫八州之民久陷夷虜。俟所蓄滿五百萬緡。遣使贍北虜。以贖山後諸郡。如不我從。即散府財募戰士以圖攻取。會上晏駕。乃寢。後改曰左藏庫。今為內藏庫。

太祖登極數年。石守信等猶典禁衛。趙忠獻屢請於上。授以他任。上乃曲燕守信等。道舊甚懷。從容曰。朕與卿等義均手足。豈有他耶。而言者累及之。卿等各自擇善地。出就藩鎮。相賦之入。奉養甚厚。優游卒歲。不亦樂乎。朕有數女。與卿結親。庶無間耳。

皆感稱謝。於是諸帥歸鎮。或有至二十餘年者。常富貴榮寵極於一時。前代之保全功臣。無以過也。

真宗嘗諭宰臣。一外補郎官。稱其才行甚美。俟罷郡還朝。與除監司。及還。帝又語及之。執政擬奏。將以明日上之。晚歸里第。其人來謁。明日以名薦奏。上默然不許。察所以。乃知已為伺察密報矣。終真宗朝。其人不復進用。真宗惡人奔競如此。

慶厯中。滕子京守慶州。屬羌數千人內附。滕厚加勞遺。以結其心。御史梁堅言。滕妄費公庫錢。仁宗曰。邊帥以財利啗蕃部。此李牧故事。安可加罪。

仁宗朝。流內詮引改京官人李師錫。上覽其薦者三十餘人。問其族系。乃知丞相王德用甥壻。上曰。保任之法。欲以盡天下之才。今但薦勢要。使孤寒何以進。止與師錫循資。后翰林學士胡宿子宗堯磨勘。以保官。亦令循資。帝之照見物情。抑權勢。進孤寒。聖矣。

英宗治平中。燕國惠和公主下降王師約。異時尚主之家。例降昭穆一等。以為恭。帝疾之。曰。此廢人倫之序。不可以為法。思有以厚風俗。亟命正之。尚未遑著於令。及神宗踐祚。乃詔公主出降。皆行見舅姑禮。是時師約父克臣為開封府判官。前一日中

使促就第。受主見行盥饋禮。禮成遂大設樂。天下榮之。三宮嬪御還者。莫不嗟歎。近姻貴戚。相與震動。以為天姬之貴。尚執行婦道。蓋自惠和始耳。唐南平公主下降王珪之子。珪坐令親執。行盥饋之禮。曰。吾豈為身榮。所以成國家之美耳。唯我祖宗。首正王化。穆然成風矣。

魯人李廷臣。頃官瓊管。一日過市。有獠子持錦臂鞵。鬻於市者。織成詩。取而視之。仁廟景祐五年。賜新進士詩也。云。恩袍草色動。仙籍桂香浮。仁祖天章拔擢。固足以流播荒服。蓋亦仁德醲厚。有以深決夷獠之心。故使愛服之如此也。廷臣以千文易得之。帖之小屏。致几席間。以為朝夕之玩。

讜論凡十一事

慶曆中。開寶寺塔災。國家遣人鑿塔基。得舊瘞舍利。迎入內庭。送本寺。令士庶瞻仰。傳言在內庭時。頗有光怪。將復建塔。余襄公靖言。彼一塔不能自衛。何福建於民。凡腐草皆有光。水精及珠之圓者。夜亦有光。烏足異也。梁武造長干塔。舍利長有光。臺城之敗。何能致福。乞不營造。仁宗從之。

夏竦薨。仁宗賜諡曰文正。劉原父判考功。上疏言。諡者有司之事。且竦行不應法。今

百司各得守其職。而陛下奈何侵之乎。疏三上。是時司馬溫公知禮院。上書曰。諡之美者。極于文正。竦何人可當。光書再上。遂改諡文獻。知制誥王原叔曰。此僖祖皇帝諡也。封還其目。不為草詔。於是太常更諡竦文莊。

嘉祐中。內臣麥允言死。以其嘗有功。特給鹵簿。司馬光言。古不以名器假人。允言近習之人。非有大功大勲。而贈以一品。給以鹵簿。不可以為法。仁宗嘉納之。

仁宗朝。司天奏。月朔日當食。而陰雲不見。事同不食。故事當賀。司馬光曰。日食四方皆見。而京師獨不見。天意若曰。人君為陰邪所蔽。天下皆知。而朝廷獨不知。其為災尤甚。不當賀。詔嘉其言。後以為例。

景祐中。趙元昊尚脩職貢。蔡州進士趙禹厪。明言元昊必反。請治為邊備。宰相以為狂言。流禹建州。明年元昊果反。禹逃歸京。上書自理。宰相益怒。下禹開封府獄。是時陳希亮為司錄。言禹可賞不可罪。宰相不從。希亮爭不已。卒從希亮言。以禹為徐州推官。但徠先生石守道有詩曰。蔡牧男兒忽議兵。謂禹也。

咸平中。孫冕乞於江淮荆湖通商賣鹽。許商人於邊上入糧草。或京中納帛。一年之內。國家預得江淮荆湖三路賣鹽課額。而又公私之利有十倍焉。為陳恕等沮之。遂

寢。

臨淄賈公疎先生以著書扶道為己任。著山東野錄七篇。頗類孟子。常奏諫書四篇。謂丁謂造作符瑞以誣皇天。以欺先帝。今幸為姦發。請明告天下正其事。無幾又謂謂既竄逐。寇萊公猶在雷州。宜還萊公。以明忠邪。先生終以孤直不偶。既晚得進士出身。不樂為吏。久之李文定公竊其誥敕。送吏部。先生勉就之。官至殿中丞。卒後門人李冠元伯。劉顏子望。相與謚曰存道先生。初先生得出身。真宗賜名同。改字希得。

案公疎元名國故賜改同

狄武襄公既平嶺南。仁宗欲以為樞密使。平章事。龐莊敏公曰。太祖遣曹彬平江南。止賜錢二十萬。其重慎名器如此。今青功不及彬遠矣。若用為平章事。富貴已極。後安肯為陛下用力。萬一後有寇盜。青更立功。陛下以何官賞之。乃以青為護國軍節度。諸子皆優官。厚賜金帛。

真宗初上仙。莊獻攀慕號切。凡喪祭之禮。務極崇厚。呂文靖公奏曰。太后為先帝喪紀之數。宗廟之儀。不忍裁減。曲盡尊奉。此雖至孝之道。以臣所見。尚未足報先帝恩遇之厚。唯是遠姦邪。獎忠直。惜民財。拔擢時彥。使邊徼寧靖。人物富安。皇帝德業日

茂太后壽樂無憂。此報先帝之大節也。

祥符中。玉清昭應等宮成。大臣率兼使領。天聖中。玉清災。莊獻泣曰。先帝尊奉先祧。故大建館御。以盡祗肅之道。今忽災燬。何以稱先帝遺意。呂文靖公恐后復議繕完。因推洪範災異之端。乞罷營建。懇讓使名。玉清遂不葺。

田錫以謹直事太宗。知無不言。深得諍臣之體。一日詣中書謁趙忠獻公。曰。公以元勳當軸。宜自謙抑。今百司奏覆。必先經堂。豈尊君之義也。諫臺章疏。令閤門進狀。尤失風憲之體。趙竦然謝之。遽從其言。

澠水燕談錄卷第二

宋 齊國王聞之聖塗著

名臣 凡五十事

宰相王溥父祚。少為太原掾屬。宿州防禦使既老。溥勸其退居洛陽。居常快快。及溥為相。客或候祚。溥常朝服侍立。客不安席。求去。祚曰。學生勞賢者起避耶。

張忠定公詠布衣時。希夷先生一見奇之。曰。願分華山一半居可乎。先生曰。非公可及。別贈以毫楮。公曰。是將嬰我以世務也。後公貴顯。以名德重天下。將赴劍南。以詩寄先生曰。性愚不肯林泉住。剛要流清擬致君。今日星馳劍南道。回頭慚愧華山雲。及還。又有詩曰。世人大抵重官榮。見我東歸夾道迎。應被華山高士笑。天真喪盡得虛名。

王元之嘗草李繼遷制。繼遷送馬五十疋。潤筆。公却之。後守永陽。閩人鄭褒有文行。徒步謁公。及還。公買一馬遺之。或謗其虧價者。太宗曰。彼能却繼遷五十疋。顧肯虧一疋馬價耶。

曹冀王彬。前後帥師征討諸國。凡降四國主。江南西川。廣南。湖南也。未嘗殺一無辜。

功名顯著。為諸將之首。諸子賢令。瑋琮璵繼領旌鉞。陶弼觀王畫像。有詩曰。蒐兵四解降王纘。教子三登上將壇。其後少子玘追封王爵。實生光憲。慈聖太皇太后輔佐仁宗。母儀天下。累朝聖功仁德。天下懷慕。以至濟陰生享王爵。子孫昌熾。世世無比。非元功陰德。享報深厚。何以及此。雖漢之馬郭。迨無以過此。嗚呼盛哉。

張僕射齊賢。以吏部尚書知青州六年。其治安靜。民頗安之。好事者或謗其居官弛慢。朝廷召還。公或語人曰。向作宰相。幸無大過。今典一郡。乃招物議。正如監御厨三十年。臨老反煮粥不了。士大夫聞之。深罪謗者。曾孫仲平為余言。

真宗晏駕。二府受遺制。輔立仁宗。及皇太后權聽斷軍國事。宰相丁謂欲去權字。王沂公時參大政。獨執之曰。皇帝冲年。太后臨朝。斯非國家常典。稱權猶足示後。況言猶在耳。何可改也。謂深感其言。權字遂不敢去。

祥符中。趙德明上言。本國饑。來借粟百萬斛。大臣皆請以違誓責之。王魏公旦獨請具粟如其數於京師。詔德明入京來取。德明大慚。且歎朝廷有人。真宗喜。

真宗朝宦者劉承珪。以端謹事上。病且死。求為節度使。上從授之。王魏公旦執不從。曰。復有求為樞密使者。何以絕之。至今宦者官不過留後。